

**Broj: 06-03-869-12/21/09**  
**Mostar, 16.03.2010.**

Na osnovu člana 79. stava (2) Zakona o električnoj energiji („Službene novine Federacije BiH“ broj 41/02, 24/05, 38/05, 61/09), člana 12. stava (1) i člana 14. stava (1) Statuta Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 13/04), člana 31. stava (2) i člana 37. stava (3) Poslovnika o radu Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 59/04) i člana 16. stava (1) Pravilnika za izdavanje dozvola-licenci („Službene novine Federacije BiH“ broj 29/05), Regulatorna komisija za električnu energiju u Federaciji Bosne i Hercegovine-FERK je, na IV redovnoj sjednici održanoj u Mostaru dana 16.03.2010. godine, donijela

## O D L U K U

### Član 1.

- (1) Usvaja se nacrt Prethodne dozvole, u postupku izdavanja dozvole po Zahtjevu za izdavanje prethodne dozvole za izgradnju proizvodnog objekta mHE „Kaljani“ broj 06-03-869/21/09 od 27.08.2009. godine, podnosioca zahtjeva „ENERGONOVA“ d.o.o. Sarajevo, u tekstu kako je predložen na dnevni red za sjednicu, s dopunom u nacrtu Prethodne dozvole za izgradnju proizvodnog objekta, kako slijedi:
  - u tački 3.4. Tehničke karakteristike objekta, iza druge alineje dodaje se nova treća alineja, koja glasi : „Detaljan pregled osnovnih tehničko-energetskih parametara mHE „Kaljani“ dat je u Prilog 1 ove dozvole.“
- (2) Nacrt iz stava (1) ovog člana je sastavni dio ove odluke.

### Član 2.

Ova odluka stupa na snagu danom donošenja i objavljuje se na oglasnoj tabli i web stranici FERK-a.

## O b r a z l o ž e n j e

Članom 5. Pravilnika za izdavanje dozvola-licenci određeno je da lice koje namjerava graditi ili rekonstruisati elektroenergetske objekte i postrojenja za proizvodnju i distribuciju električne energije na teritoriji Federacije BiH ima obavezu i odgovornost podnijeti FERK-u zahtjev za izdavanje dozvole. Dana 27.08.2009. godine, FERK je primio od „ENERGONOVA“ d.o.o. Sarajevo, Zahtjev za izdavanje prethodne dozvole za izgradnju proizvodnog objekta mHE „Kaljani“ broj 06-03-869/21/09.

Prilikom pregleda kompletnosti podnesenog Zahtjeva, u skladu sa članom 39. Pravilnika o javnim raspravama i rješavanju zahtjeva i žalbi FERK-a, FERK je utvrdio da podneseni Zahtjev nije kompletan u smislu člana 36. stava (2) i stava (3) Pravilnika za izdavanje dozvola-licenci. Zbog navedenog, FERK je postupajući u skladu sa članom 40. Pravilnika o javnim raspravama i rješavanju zahtjeva i žalbi FERK-a dostavio podnosiocu zahtjeva Obavještenje o nedostacima podnesenog Zahtjeva za izdavanje prethodne dozvole za izgradnju proizvodnog objekta broj 06-03-869-02/21/09 od 15.09.2009. godine, te mu

odredio rok radi otklanjanja u Obavještenju naznačenih nedostataka i upozorio ga na posljedicu propuštanja.

Postupajući po Obavještenju, podnosilac zahtjeva je dostavio 26.10.2009. godine Dopis primljen u FERK pod brojem 06-03-869-04/21/09, uz koji je dostavio dio tražene dokumentacije i obrazloženja.

U cilju prikupljanja svih potrebnih informacija i dokumentacije, FERK je podnosiocu zahtjeva uputio 11.11.2009. godine Zahtjev za informacijama broj 06-03-869-05/21/09, a povodom kojeg je podnosilac zahtjeva dostavio 26.11.2009. godine FERK-u Dopis primljen pod brojem 06-03-869-06/21/09, te dana 01.12.2009. godine Dopis primljen pod brojem 06-03-869-07/21/09, a dana 15.01.2010. godine dostavio u FERK Dopis primljen pod brojem 06-03-869-08/21/09, uz koje je dostavio traženu dokumentaciju i obrazloženja.

Postupajući u skladu sa članom 11. Pravilnika za izdavanje dozvola-licenci, FERK je dana 25.02.2010. godine u „Oslobođenju“ i „Dnevnom listu“, kao i na svojoj web stranici objavio Obavještenje za javnost o podnesenom Zahtjevu za izdavanje prethodne dozvole za izgradnju proizvodnog objekta mHE „Kaljani“ podnosioca zahtjeva „ENERGONOVA“ d.o.o. Sarajevo. Povodom Obavještenja za javnost, FERK do roka naznačenog u Obavještenju odnosno do 05.03.2010. godine do 12:00 sati, nije primio pisane komentare zainteresovanih lica na podneseni zahtjev, niti su podneseni zahtjevi za sticanje statusa umješaća.

Na osnovu navedenog, a u skladu sa članom 77. Pravilnika o javnim raspravama i rješavanju zahtjeva i žalbi FERK-a, FERK je dopisom broj 06-03-869-10/21/09 od 09.03.2010. godine obavijestio podnosioca zahtjeva da će FERK provesti postupak izdavanja dozvole, bez održavanja formalne rasprave, te istom dao mogućnost da ukoliko raspolaže novim činjenicama u vezi s predmetom postupka, iste predstavi, odnosno uputi svoje komentare FERK-u do 12.03.2010. godine do 12:00 sati.

Postupajući po navedenom obavještenju, podnosilac zahtjeva je u FERK 15.03.2010. godine dostavio dopis primljen pod brojem 06-03-869-11/21/09 u kojem je naveo da je saglasan da se postupak izdavanja dozvole provede po skraćenom postupku i nije iznio nove činjenice u vezi s predmetom postupka, te nije uputio druge komentare FERK-u.

Na osnovu pažljive analize svih činjenica i podnijetih dokaza, a u skladu sa članom 79. stavom (2) Zakona o električnoj energiji FERK je odlučio kao u dispozitivu odluke.

**PREDSJEDNIK FERK-a:**

Zdenko Šimunović s.r.